



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN
E TË DHËNAVE PERSONALE

Nr. 521/4 Prot

Tiranë, më 15.06.2016

VENDIM

Nr. 29, datë 15.06.2016

Në mbështetje të neneve 29, 30 dhe 32 të Ligjit nr. 9887, datë 10.03.2008, "Për Mbrojtjen e të Dhënave Personale" i ndryshuar, Ligjit nr. 44/2015 "Kodi i Procedurave Administrative të Republikës së Shqipërisë", si dhe provave të administruara në ngarkim të kontrolluesit Spitali Rajonal Gjirokastrë, me aktivitetin e tij në formën ligjore person juridik,

VËREJ SE:

Në zbatim të Urdhrit nr. 110, datë 06.05.2016 të Komisionerit për të Drejtën e Informimit dhe Mbrojtjen e të Dhënave Personale, është kryer hetim administrativ pranë kontrolluesit Spitali Rajonal Gjirokastrë, me objekt:

- Zbatimi nga ana e kontrolluesit Spitali Rajonal Gjirokastrë, i Ligjit nr. 9887 datë 10.03.2008 "Për Mbrojtjen e të Dhënave Personale" i ndryshuar, dhe akteve të miratuara nga Komisioneri gjatë kryerjes së aktivitetit të tij, në lidhje me masat për sigurinë e të dhënave personale, në zbatim të nenit 27 të ligjit.

Nga hetimi administrativ i kryer pranë këtij kontrolluesi, nga grupi i inspektimit është konstatuar:

1. Kontrolluesi nuk ka një rregullore specifike për mbrojtjen e të dhënave personale, por në rregulloren e re "Mbi organizimin dhe funksionimin e spitalit", e cila është në fazë miratimi, është parashikuar edhe përpunimi i të dhënave personale dhe ruajtja e konfidencialitetit gjatë dhe mbas përpunimit të tyre.
2. Kontrolluesi nuk aplikon për punëmarrësit "Deklaratën e Konfidencialitetit".
3. Kontrolluesi nuk ka marrë masa teknike të përshtatshme për ruajtjen e dosjeve fizike të pacientëve.
4. Kontrolluesi ka vendosur një sistem video-vëzhgimi (CCTV) i cili administrohet nga punonjësit e brendshëm të teknologjisë dhe informacionit. Në hyrje të ambienteve të mbikëqyrura, janë vendosur tabela informuese por ato nuk janë sipas formatit standard të miratuar në Udhëzimin nr. 3 të Komisionerit;

Faktet e mësipërme përbëjnë shkelje administrative të neneve 27 dhe 28 të Ligjit nr. 9887/2008 “Për Mbrojtjen e të Dhënave Personale” i ndryshuar, Vendimit nr. 6 “Për përcaktimin e rregullave të hollësishme për sigurimin e të dhënave personale” si dhe Udhëzimin nr. 23 “Për përpunimin e të dhënave personale në sektorin e shëndetësisë”.

Për shkeljet e konstatuara, është mbajtur procesverbali i kontrollit administrativ, datë 24.05.2016, në të cilin përfaqësuesi i kontrolluesit nuk ka paraqitur pretendime.

Në zbatim të neneve 87-88 të Ligjit nr. 44/2015 “Kodi i Procedurave Administrative të Republikës së Shqipërisë”, më datë 13.06.2016 është organizuar seanca dëgjimore me përfaqësuesit e kontrolluesit lidhur me konstatimin e grupit të kontrollit administrativ, përpara marrjes së vendimit përfundimtar.

Në seancën dëgjimore, përfaqësuesi i kontrolluesit paraqiti pretendimet e mëposhtme:

- 1) Mbas kontrollit të ushtruar nga inspektorët e Zyrës së Komisionerit dhe njohjes me detyrimet ligjore përkatëse, Spitali Rajonal Gjirokastër konkludon se shkeljet qëndrojnë;
- 2) Ka filluar puna për miratimin e “Deklaratës së Konfidencialitetit” dhe nënshkrimin e saj nga punëmarrësit e Spitalit Rajonal Gjirokastër;
- 3) Rregullorja e re në të cilën janë parashikuar rregulla në lidhje me përpunimin e të dhënave personale, është në proces miratimi.
- 4) Aktualisht po shikohet mundësia e përshtatjes së ambienteve të reja në lidhje me vendosjen e kartotekës.

Si përfundim, Zyra e Komisionerit konkludon se shkeljet e konstatuara gjatë ushtrimit të hetimit administrativ në kuptim të nenit 39 pika “1”, shkronja “dh” e Ligjit nr. 9887, datë 10.03.2008 “Për Mbrojtjen e të Dhënave Personale” i ndryshuar, përbëjnë “kundërvajtje administrative” dhe sanksionohen me gjobë.

- “dh) Kontrolluesit ose përpunuesit, që nuk marrin masat e sigurisë së të dhënave dhe nuk zbatojnë detyrimin për ruajtjen e konfidencialitetit, të përcaktuara përkatësisht në nenet 27 dhe 28 të këtij ligji, dënohen me nga 10 000 deri në 150 000 lekë.”

Kontrolluesi Spitali Rajonal Gjirokastër, në formën ligjore të aktivitetit të tij është person juridik dhe, sipas nenit 39/2 për kundërvajtjet e mësipërme, dënohet me dyfishin e gjobës së përcaktuar në pikën “1” të këtij neni.

Për zgjedhjen e masës së gjobës, Komisioneri ka parasysh faktin se shkeljet konsistojnë në moszbatim të ligjit, akteve nënligjore dhe parimeve bazë të mbrojtjes së të dhënave personale. Ato lidhen me cënimin e sigurisë së të dhënave personale, të subjekteve të të dhënave “pacientë”.

Komisioneri gjithashtu, ka parasysh faktin që kontrolluesi ka qenë në bashkëpunim serioz me grupin e kontrollit gjatë ushtrimit të hetimit administrativ.

PËR KËTO ARSYE:

Në zbatim të neneve 27, 28, 39/1 shkronja “dh” dhe 39/2 të Ligjit Nr. 9887, datë 10.03.2008 “Për Mbrojtjen e të Dhënave Personale” i ndryshuar,

VENDOSA:

1. Dënimin e kontrolluesit Spitali Rajonal Gjirokastrë, me gjobë në vlerën **50 000 (pesëdhjetë mijë) lekë** për shkelje të detyrimit të përcaktuar në nenin 27 të Ligjit nr.9887, datë 10.03.2008 "*Për Mbrojtjen e të Dhënave Personale*" i ndryshuar.
2. Dënimin e kontrolluesit Spitali Rajonal Gjirokastrë, me gjobë në vlerën **50 000 (pesëdhjetë mijë) lekë** për shkelje të detyrimit të përcaktuar në nenin 28 të Ligjit nr.9887, datë 10.03.2008 "*Për Mbrojtjen e të Dhënave Personale*" i ndryshuar.
3. Kontrolluesi Spitali Rajonal Gjirokastrë të realizojë pajisjen e kontratave të punëmarrësve me "*Deklaratat e Konfidencialitetit*" sipas Vendimit nr. 6, datë 05.08.2013, brenda një periudhe prej 30 ditësh.
4. Kontrolluesi Spitali Rajonal Gjirokastrë, të marrë masa të përshtatshme teknike dhe organizative për ruajtjen e dosjeve fizike të pacientëve pranë kartotekës.
5. Kontrolluesi Spitali Rajonal Gjirokastrë, të marrë masa për vendosjen e tabelave informuese mbi prezencën e sistemit të video-vëzhgimit (CCTV) sipas modelit standard të miratuar në Udhëzimin nr. 3 të Komisionerit.
6. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e afatit të ankimit, ky vendim kthehet në titull ekzekutiv dhe ekzekutohet në mënyrë të detyrueshme nga zyra e përmbarimit.
7. Kundër këtij vendimi mund të bëhet ankim në Gjykatën Administrative të Shkallës së Parë, Tiranë, brenda 30 (tridhjetë) ditëve nga komunikimi i këtij vendimi.

Ky vendim u shpall sot, më 5.06.2016

